

*phalum, Aqueductum, & alia Antiquitatis Monimenta. Fori Veneris memoriam servari ajunt in Forviere.* Ab ea Vrbe nobilissima Gallia Pars in quinque destincta quondam est *Lugdunenses* I, II, III, IV, V; uti in Notitia Provinciarum Gallia, est videre. Igne Fatali miserandum in modum suo tempore exustam conqueritur, Clademque inde acceptam deplorat epistola ad Lucilium xci i Seneca. Accidit centesimo anno ab Colonia deducta, eodem Seneca observante. Solatium isti calamitati adhibitum ab Nerone, septimo post Incendium anno. Legendus Tacitus lib. xvi Annal. Quum ejus Mœnibus se continuisset Albini exercitus, ab Imperatore Severo obfessa, brevi post capta, direpta, iterumque incensa fuit: uti refert Herodian. lib. III. *Lugdunum* Philippus Pulcher Francorum Rex Pontificis jussu Ditioni suæ adjecit, scribente in Annalib. Papirio Massonio. Vrbs hæc hodie amœno commodoque sita loco, natura fere inexpugnabilis; ab una parte duobus munita Collibus iisque fructiferis, ab altera totidem beata Fluvii, Arari, Rhodanoque; Templorum Ædificiorumque, cum publicorum, tum privatorum magnificentia superbiens; opibus & mercatura supra modum florens: ut celeberrimum facile sit hodie totius Gallia Emporium, Regniq; Cor & Clavis instar, qua Aditus recluduntur in Italiam, Germaniam, aliasque Provincias: confluentibus eo ad publicas Nundinas solenniter, & ex conducto quasi, quater singulis annis undique variarum Gentium Mercatoribus. Regnante Carolo IX, quum tota arderet Bellis Civilibus Gallia, Arcem futuris motibus averruncandis, invita satis, accepit: Sedes est cum Archiepiscopalis, cujus Præsules Belleforestius recenset cii, quique Primates se gerunt Cleri Gallicani; tum Prædialis & antiquus Seneschallatus, cui subsunt Territoria *Lugdunense, Forense, Matisconense & Bellojole-* *zium;* quæ postea nonnihil mutata. *Ecclesiam Lugdunensem* Bernardus Abbas Clarevallensis hoc celebrat Elogio: Inter Ecclesias Gallia constat profecto *Lugdunensem* anteire, sicut dignitate Sedis, sic honestis Studiis & laudabilibus Institutis. Ubi enim æque viguit Disciplina Censura? Morum Gravitas? Maturitas Consiliorum? Auctoritatis Ponderus? Antiquitatis Insigne? Præsertim in Officiis Ecclesiasticis haud facile umquam visa est repentinis Novitatibus acquiescere, nec se aliquando juvenili passa est decolorari Levitate. Atque hæc de Tractu Lugdunensi dicta sufficiant: ad Helvetiam transeo.